

四庫全書

子部

欽定四庫全書

翰苑新書續集卷二十三

武臣類

賀郭殿帥知揚州

應松湖

奏最殿巖總戎邊閫煌煌金節方拱扶斗極於紫霄黃
道之間獵獵神旗忽鎮壓江淮於絳節碧幢之下稟奉
九天之睿筭愴宣萬里之皇靈驩動轅門和薰比屋竊
以羽林握天軍之要齋壇肅大將之威入則陞戟周廬

壯七萃八屯之衛出則雕戈錫盾顯五侯九伯之征周
條侯以太尉而將三十六軍遂平七國霍驃姚以司馬
而領十四萬騎果克匈奴於戲聖朝遐參漢制皇祐之
平交廣狄武襄宣撫於荆湖元豐之拓熙河郭宣徽總
制於涇陝率繇禁列出殿帥垣而況山西之將家無出
汾陽之華裔中書二十四考獨盛前朝南渡七八十年
采隆奕葉列第交施于棨戟豐功踵刻於鼎彝赫然芝
檢之新貌是棠陰之舊一門將相未數北平之祖孫三

世威名可繼慶州之父子某官虎視龍驤之勇鸞翔鵠
峙之姿聯勾陳而扈太微懋便蕃於睠渥封姑胥而臨
瀚海素慷慨於功名方敵運之衰殘軫廟謨之經畫念
雖坐籌玉帳可折遐衝不如馳至金城親上方略屬茲
謀帥無以易公輟還尹而作元戎上意蓋深於北顧總
勁兵而蒞大府先聲倍讐於朔陲鳴劔抵掌以睨關河
犁庭擣穴以墟沙漠勒燕然之石垂之萬年挈輿地之
圖還之九廟與國無極視祖有光某骭髀書生蕭疎冷

職銅花欲蝕凜秋水之劍芒鐵硯未穿淬毛錐之筆陣
逃瞻幕府願曳賓裾摧越河之鋒方聳聽劉琨勸進之
表獻平淮之雅愧莫賡唐人皇武之詩

賀張總管

真西山

伏審護細柳之屯屈司亞旅告及瓜之戍愧辱先施載
戢高情可稽報積恭惟某官深雄而有立整暇而善謀
橫槊賦詩雅閑儒術輕裘緩帶克紹家聲鏘鳴賓闥之
聯清肅臚傳之句自違九陛數總五符顧我連營已改

旌旗之色抑君雋武會看旌節之傳某甚幸同寅已欣
快觀典型猶在仍尋射圃之盟氣槩相親預寄烹魚之
素

與薛都總

王臞軒

為紅蓮幕之遊陪諸從事望細柳營之遽有真將軍文
武雖曰殊途彼此皆為王事行將之戍敢不通名某官
聲名燭於冰天忠義貫於霜日家傳韜畧不求紙上之
孫吳神授智謀自有胸中之方虎八面才何施不可萬

人敵所向無前中外游更勞庸茂著董衛兵之成長車
駟蜀道以不辭剖宣化之符清節比鄂湖而相應便合
齋壇而大拜乃煩專鉞於遐陬方今邊正飛塵敵猶假
息三箭而天山定行揚家世之風一舉而朔庭空會見
國讐之雪茂宣皇畧徑陟殿巖如某其人見謂不武雖
有清中原之志其奈才疎不圖為宦海之游獲交人傑
帳下願預聞於露布坐間幸無厭於綠衣氣概苟同形
迹可畧聞雞聲而起舞又焉用腐儒為銘麟閣而贊功

庶幾從執事後

通周太尉

洪平齋

伏以近長安之日記陪天上之遊對江東之雲健想軍中之樂無從抵掌祇有傾心恭惟某官氣稟西山聲搖赤壁號萬人之敵名在伏波翰墨之場當八面之鋒勇過晏子樽俎之畧中國襟喉之既固外蕃心膽之自寒況以真將軍堅壁之餘風而奉太夫人安輿之一笑忠孝兩盡若是艱哉文武兼資特其細爾功既高於敵愾

賞未稱於酬勞擁中權於天塹之陽懷遠算於祁連之北雖講止戈之武不忘擊楫之心江漢草木之知名坐底三邊之靜山河帶礪之申檠亟膺兩鎮之榮某榆莢生涯菊花歸夢月明鵲繞每思賡橫槊之詩秋高馬肥敢後寄加餐之字

回繆路鈴

方秋崖

護戎虎帳遡太微上將之光分教鱣堂笑廣文先生之冷抑何幸甚相與驩然恭惟某官妙入尉繚子之書浩

投定遠侯之筆一九泥封函谷雖有其志而無時半段
槍擊單于當奪之氣而挫銳蓋今鄰徼幾欲亂華乃者
長驅漢水之濱直擣樊城之險非峴首之屹爾則江面
其殆哉伊邇秋風已無暇日不留賊以遺君父亟運帷
籌擅安邊而立功名誕分齋鉞某璞如鄭鼠技止黔驢
推別省之一夔偶見收於犇北儕甲科之八愷曾未快
其圖南何知經席之重獨喜戎旃之近燈寒夜雨共談
儒者之兵字老春苔更訪醉翁之墨行瞻立玉式契斷

金

回蘇路鈴

黃竹坡

上有恩言孰可堪於將相公由人望遂出總於兵鈴英
聲四馳士氣百倍敢馳片削敬候前驅某官忠義自將
勲名未艾稟山西之勁氣用則無前讀濟北之遺書言
皆可績宜大攄於英略尚屈總於外營風閃朱旗坐弭
龍編之警雨拋金鎖少安虎帳之閑第兩河屬望之深
恨九廟掃清之晚登賢有日成效可期西取闔山四十

州當快唐人之誦益封將軍五千戶即聆漢詔之頒某
猥以非才試茲劇邑將及瓜期之戌喜聞行李之來大
劒長槍自笑毛錐之陋短衣足馬願從羽獵之遊

回列路分

洪平齋

客子懷歸已作吳山之清夢將軍出戌忽傳楚水之先
聲幸甚逢迎居然慰滿恭惟某官元戎威畹紹聖將家
班超投筆之功名欲酬壯志馬援據鞍之意氣自負長
材獨恃沈深之謀共謂老成之器屈臨一道坐護諸戎

春風散入於柳營
夜月盡空於蒲澤
小煩騏驎聊馳轎軸
之間佇看貂蟬遂出
兜鍪之上某便期滿
去還喜鼎來絳帳倦
遊敢起無羶之嘆碧
幢多暇尚陪橫槊之
吟

回譚都巡

習春秋曾進列國傳因申解賭博軍人咆哮事為之從公書擬蒙帥斷治

號令譚以啟謝

王臞軒

制軍者司馬之法不恭自有常刑禁暴者連帥之威為屬惟知從長初無絲粟之力忽辱瓊瑰之投竊謂博奕無所用心戲謔反以為虐刀遠坐赤族於馬柳幕容卜

大事於蒲神博銀鎗之營中未幾召釁反鍾離之盧子
寧有幾人於王法在所不容彼狂卒胡為冒犯牧豬奴
戲耳況敢當公庭而咆哮執鼠輩尸之蓋斷自元戎之
霹靂為有公在何謝我為某官東國大夫之故家延康
學士之遺直序春秋於吳寇始平之際奏凱九重讀左
傳於延安方戰之時才當八面乃淹警邏未展經綸行
膺宸綍之頒即據殿巖之任茲小人狃積習之弊故一
旦啟玩侮之謀已正典刑立伸威令權實由於大府恩

敢受於私家遇悍卒於微行莫損裴晉公之遠到抱遺
經以請質何當玉川子之辱臨

回李巡轄

劉後村

斥堠之司古以為重絃歌之寄今之所輕輒修告至之
辭以叙同寅之雅恭惟某官沈雄天稟慷慨自期慕廉
頗李牧之風為孫武吳起之學十里一置五里一堠姑
煩巡徼之勞萬人曰俊千人曰英會展規恢之畧某偶
叨民社實接官曹將軍乃肯臨臣非敢望也夫子明以

告我方有賴焉

回武官

方秋崖

某伏奉劄翰良忉盛心官無卑高職業則一勉旃寅協
式副所期略此占酬等幾紆監

謝戴將使

李梅亭

邂逅適願已幸識荆恹恹裝懷未遑訪戴既感輕身先
匹夫之意復有一紙賢十部之榮某官天分軼羣人門
濟美翼扶九萬里決應海運於南溟腹笥五千家暫隱

天樞之北落勇早聞於六館陣獨掃於千軍會當定一
霸於螯弧何難連八科之麟角袞明日月更看黃榜之
新履上星辰始是青氈之舊某舊交羣從今識清標聞元
方季方之齊名亦既見止從延君少君而受禮更幸進
之

翰苑新書續集卷二十三

欽定四庫全書

翰苑新書續集卷二十四

寄居類

通曾大參

王臞軒

鴻臚賜第曾私一氣之釣麟校司文復邇三台之府敬憑
卿墨僭瀆帥籤竊以鄉莫重於達尊士要親於前輩魏
公居畫錦之日問業有徒迂叟處獨樂之時及門者衆
而況德師一代位冠百僚如東魯之有泰山咸瞻峻極

如泗洲之有大聖共仰威光曾謂竒窮得此遭遇恭惟
某官名垂宇宙勲在鼎彝大廷為舉首之奏篇輸忠懇
切寧廟得力行之一說饗國靈長昔宣靖有位而文無
稱及南豐有文而位不顯惟耳孫之間出視鼻祖以增
光方在盛年徧儀華貫入則參國鈞之重出而揚宣幕
之威雖愬帥鄧顏帥陳賴元臣之往視然范公西杜公
北宜君子之永嘆其道不同難相為謀見幾而作不俟
終日等軒裳於物外卷兵甲於胸中維時新君眷懷舊

弼十連借重曉行湘水之春一壑來歸暮捲西山之雨
雅意午橋之行樂何心寅陛之押班開擎天之柱於匠
林橫濟川之舟于野渡自謀則善人望謂何方國事之
日新而善類之星散名節頽而莫為之振起議論勝而
罕見之施行向焉誇嘉橘之栽未幾成枳甚者悔芳蘭
之佩甘化為茅惟元氣之受傷致外邪之交作天欲平
乎天下相復出於相門柄用有期嚴瞻正切南渡諸賢
出處之節孰盛名公西墅十年著述之書併歸國史伏

念某癖惟嗜古樣不入時對策廣廷徒有空臆盡言之
直校文列陞乃罹疾聲大呼之讒比求宗邸之冷官隨
得翹林之化筆未能道道敢好為師幸大州本父母之
邦而年家泰子弟之列告戒之以藥其失提撕之以玉
于成既有儒宗以依歸可免生徒之誦謗函丈前之教
誨倘許樞趨夾袋內之姓名冀叨收錄

通費參政士寅

李梅亭

分小隊於少城將安問政倚鉅人之長德行可庇身請

裁吾黨之斐然來事是邦之賢者恭惟某官賦姿肅括
蹈行中庸長卿吞雲夢之胸豈以八九而芥蒂太白金
岷峨之眼尚餘一萬之琳琅簡上帝心為公室輔固已
重清廟九九之鼎謂當應泰階兩兩之符乃甘松菊之
主人暫作園林之勝事道之將行也命天將降任是人
佇一馬二童之來增六鰲三極之重公有無窮之聞民
無不獲之夫某藹然棗昏重以木訥躡冒清華之選遂
塵碧落之班所期乞一障之乘詎敢作三刀之夢惟是

夙仰翹材之館乃今得依通德之鄉避正堂而舍蓋公
定難屈致置盃水以教任守尚幸告忠

通王侍郎

王臞軒

少而抱槩久瞻魁宿於璇霄壯也彈冠行覩德星於珂
里雖素於左右殊無介紹然見之方冊不昧平生敬飭
訥詞僭干嚴分恭惟某官任重而道之遠表粹而裏則
剛方在韋布之時已負縉紳之望紫府點頭碧雲章句
號閭苑之謫仙素王喜色黃甲科名協湘川之佳讖別

壺芸館含香錦闌翠節朱轡幾沛黍苗之雨紫薇紅藥
曾依香案之雲方為禁從以小留乃厭承明而丐去十
連為帥力蘓凋瘵之氓五嶺皆炎變作清涼之境胡然
為衆所忌正坐其名太高一壑來歸六丁莫挽髮為憂
邊而半白心思報國以常丹寇公不入中書莫答羶裘
之問裴相方遊綠野其如柱石之衰佇下綸音徑司國
柄伏念某弱惟殖學貧只賣文固嘗感慨於事功其奈
間關於場屋大廷對策妄陳憂國之孤忠末第書名何

惜避人之三舍來傍蓮池而謾仕已驚瓜戍之過期胡
遲其來蓋恐素官之無譜或贊其決以有達尊之可師
惟願矜憐臭味之同庶有終始悒悒之託俾遂親養得
逭官箴楊儀之無材力之可稱正深廩廩宓子賤待老
成而後決尤切拳拳

代董制帥通許侍郎

庚劉閣學光祖

李梅亭

石均和墨蹤升獻納之班玉壘分符更冒蕃宣之寄歸

然地重蕞爾人微實惟鄰寶之依敢廢書函之敬恭惟
某官清時碩德名世真儒惟其特立而獨行造道自得
故能難進而易退經德不回至今猶侍臣之冠歷年賜
方伯之履在外則植旗旄羅弓矢公豈此榮其功之銘
鼎彝被絃歌士誠有望佇起几安之烏亟馳介大之圭
某見謂疎庸誤蒙簡注願乘一障豈能堪十乘之行縱
駕兩轡何敢作三刀之夢冒焉叱馭願在執鞭嗟遠道
胡為來哉孰寬脅息居是邦事其賢者載慰心期

代通易尚書

被

朱湛盧

候長沙之星慚叨分閭望尚書之斗喜在鳴珂已脂轄
以首塗亟擘牋而抒敬某官輪囷與學絢爛高文紅錦
賜袍登仙掖鑾坡之上紫荷持索在屬車豹尾之中頡
頏飛霞簸弄明月方欲作郊祀之歌以粉飾禮樂抑且
規帝王之制而裁成典墳忽觀蒼狗之浮雲盡付黃梁
於昨夢詩書之教鳩舌天令變於姬姬吟詠之落烏蠻
人競傳於欵乃騎鯨故去跨鶴俄還竊惟平生討論述

作之工實得前日寂寞閒寬之力崑崙碣石細箋禹貢
之山川鄉遂井田增釋周官之制度已驟騰於紙貴頗
傳習於經生向使黃扉紫闥而並顯其身安得玉佩瓊
琚以大為不朽殆天心之有屬豈世俗所能知舒卷隨
時寧久篋中之團扇論思有詔即還坐上之青氍某猥
以庸才游膺重寄繼常侍湖南之詠自顧非才聽任公戶
下之規願安承教

通留舍人

王臞軒



挾策免園早誦詞場之製橫經麟序晚依相閣之華半
生企峻於雲霄不日挹清於冰玉語心自賀班賁為容
敬惟某官學貫天人名垂宇宙以尊主庇民為己任以
通今博古為儒宗文人才士各有偏長鮮兼十體之美
大科異等已為難事況出三台之門方在青春徧儀華
貫鑒坡揮翰非他學士之可言螭陞濡毫有古良史之
遺直片語不合勇去莫留行吟康樂之池塘選勝鬱孤
之臺榭大節固足起庸夫之懦高名亦能來羣兒之讒

壯歲風雲如豪鷹俊鶻之直上中年泉石與曉猿夜鶴
以相從逃名而名自歸遯世而世莫舍雖欲全韓魏公
之節自愛晚香然未及范景仁之年求閒太早竊窺大
賢之出處以卜世道之汙隆深刻堅珉揭諸葛出師之
一表短章大韻有杜陵戀闕之丹心今日幸公道之漸
開諸賢多即家而起用離而復合否者將通相復出於
相門繫時人望天欲平乎天下以我公歸伏念某樣不
入時癖惟嗜古學類醯雞之在甕仕如鮎魚之上竿帝

城風月之無邊方思贊畫宦海波濤之叵測嘖有煩言
不能追擔墓之風聊復草問釣之賦竭來倚席寒甚無
羶所幸鴻儒之可師一洗鯁生之陋習聆函丈前之教
誨以淑諸生備夾袋內之姓名敢期他日

通留經畧

王臞軒

西洛耆英嘯傲三台之府南宗冷宦依棲數仞之牆先
上日以通名望下風而起敬竊以先達之於後進世族
之於素門勢分固殊投合亦寡惟元城之在宋間業有

徒與了翁之居淮及門者衆而況三朝元老之嫡嗣一代人物之宗師稍有識知皆思歸嚮恭惟某官文章奎壁德望華嵩忠孝通乎神明出處關於世運故國謂有喬木稱到於今後人猶愛甘棠何況其子方春秋之鼎盛歷中外以游揚郎省陞華風采耀鳴珂之列虜庭出使笑談獲全璧之歸持麾把節於湘中易地建臺於江右仁心撫字山林野史之屢書陰德平反道路口碑之交誦開十連之帥閭屹百粵之長城惠行而龍戶驩呼

威肅而鯨波恬靜奈外地去天之遠而浮雲蔽日之明
一壑來歸六丁莫挽蓋韓呂家傳之清白素所服膺而
金湯勢焰之薰蒸恥於炙手勁草當疾風而不改寒花
於晚節以尤香種樹山中白傅倡風流於九老植槐庭
下晉公傳事業於二郎傲睨軒裳追隨觴詠勝事園林
清時鐘鼓如許清閒上天將相平地神仙孰為輕重此
固衣冠之羨慕其如旒冕之簡懷欲副巖瞻行膺柄用
伏念某癖性嗜古樣不入時對策廣廷徒有空臆盡言

之直校文列陞乃惟疾聲大呼之讒比求宗邸之冷官
隨得翹材之化筆未能適道敢好為師幸大州本父母
之邦而年家忝子弟之列誘掖之以藥其失推輓之以
玉于成既有耆德以依歸庶免生徒之譟訕熏和染教
期為王孫公子之範模舉滯拔淹全賴察父括兄之提
挈

回雲臺劉中散

學襄

方鳥山

瞻耆英於洛社夙仰高風遣皇華於周原行親緒論未

敢登名於記室辱先寄訊於書郵一謙甚光三復以喜
恭惟某官漢廷尊宿魯國靈光道傳本統派接聖賢脈
絡一家之學問澤施生民功存社稷弓裘累世之忠勲
源遠則波深根固而葉茂恭惟執事克稱聞家飽更中
外之踐駁多識後先之文獻盡儀筆橐爰踵旂裳不拔
虞陛之夔龍乃作商山之鴻鵠怡愉雖肅子孫則其典
刑嬉遊婆娑里巷得所矜式前哲益少時事孔艱當得
老成以備黃耆咨諏之訓睠言名望豈非白首魁壘之

臣少安藥級之遊即聽蒲輪之召某久於耕釣忽爾軒
輶頗有好事人欲勒回山林之駕非得使者體若為馳
原隰之車猶幸薄遊實依通德致天子之命雖難起龔
老於田中事大夫之賢且喜拜龐公於床下

回謝大博

王臈軒

叨聞寄於湘川方承嘉惠問卿材於楚國知有英賢息
肩行李之初眯目簿書之裏鼎來芳翰彩綯駢珠楚然
谷音折我履齒某官韵鄰玉鑒氣軼金莖雲錦織裳不

用人間之刀尺昭華截琯自調天上之聲音大名高唱
於句牖小却合盛之鑾省橋園壁水方惠然而肯來舟
近蓬山乃薄之而不即少息風鵬之翼以深霧豹之文
挹浮丘拍洪崖當挽遠於逸駕入駘盪出馭娑亟歸近
於清光某官居今傍於龜鼉日課半親於雁鶩賸喜風
騷之彥暫留遊釣之鄉美人隔水秋娟娟儻破少陵之
願客子入門月皎皎尚傾山谷之懷

回衆寄居官

李梅亭

楊南平 牟涪州 侯茂州 蒲運管

再命專城甚慙惕日六條察郡誤玷觀風所幸依長者之牆用是攬慨然之轡曾脩辭之不敏辱委贄之相先

恭惟某官文武兼資循良可紀

侯茂州

器博而周才弘以

毅

蒲運管

洵美且仁柔嘉維則

汎回衆官

筆力挾岷詞源倒峽

作為黼黻卿雲河漢之無窮粲然琳琅李杜光艷之固
在有憐弄峨眉之月詎能應益部之星財匪鬼輸安得
有錢而使鬼粟非天雨若為轉粟以上天匪藉大家之

牛車難沃小雅之牡轡某自知負乘更愧贈刀大夫儼然造焉既知感矣是邦事其賢者能勿誨乎

回楊宰

醴陵

已赴官

劉後村

謾稱竹使尋元晦之舊遊欲訪草元問子雲之安在尚稽展覲聊寫謝忱伏惟某官妙深湛之思篤聖哲之好粹然家學卓爾時名射策決科蚤對丹墀之問鳴絃製錦尚為巖邑之淹想陶柳之方濃而楚騷之已續聲傳回雁焉用牛刀目送飛鳬即聯鵷序某濫茲假守渴甚

見賢孰云會面之難失於交臂之頃明月千里徒勤悵望
之私置水一盂猶幸誨言之及

回黃尉

直卿

劉後村

遠宦問津來往寓公之輶高懷感舊先貽新令之書佩
此勞謙悚然摧謝恭惟某官雄文行遠卓識際空生了
翁之里故其氣高游文公之鄉故其學粹久矣見推於
月旦宜其立致於雲霄乃屈脩程尚須遠戍乘龍有喜
又何妨秦贅之嘲振鷺于飛行且接周行之彥某散材

無用漫仕不諧少從幕府之遊下筆颯颯晚識田家之
樂拊缶烏烏非就男封蓋謀親養豈謂繼煎熬之後若
為施採藥之方接壤而居君想熟知其利病避堂以舍
僕方有賴於歲規



翰苑新書續集卷二十四

欽定四庫全書

子部

翰苑新書續集卷二十八

五至

詳校官中書臣葉元符

主事臣祁韻士覆勘

總校官知縣臣楊懋珩

校對官中書臣王 頊

謄錄監生臣卽士洙

欽定四庫全書

翰苑新書續集卷二十五

學職類

謝永州鄭學諭

李梅亭

一聽履聲已喜似人之見載披手筆更欽博我之文得
非所蒙願竊有復恭惟某官學探聖瀆秀出愚溪窮司
農之經諒皆殫洽客廣文之舍大似淹回佇即摘髭亟
其奮翼其不能教胄有自轉丞僅簿書獄訟之餘其交

以道則道德性命之理當誦所聞

謝張學諭

李梅亭

吟墻竹之公事自分丞聾聞泮林之好音還成伎癢亟
裁四六就謝萬分恭惟某官氣韻淑均風猷膚敏尋西
塞桃花之鰕豈其河鯉之逢思東吳蓴菜之鱸行矣溟
鯤之化無厭俗情之傲贅即觀鄉賦之拔尤某聊爾治
中奚勞賀上膺何如昔已無可取之楷模籍也抱能尚
可相從於閭里

回吳學正

李梅亭

洗塵土之袍未遑請益披月露之牘良佩鳴謙藏以為
榮報於何有恭惟某官風猷凝遠天韻淑均炳扶輿磅
礴之靈富詰屈聳牙之學生九辯九歌之地豈自隔於
脩門挾八戰八克之能將差強於敵國四六且工於駢
儷三千足想於縱橫某有幸依仁過勤委贄故將軍之
雌伏難言李廣之無雙新進士之龍飛惟祝吳公之第

一

回張學正

方秋崖

某與滁人遊瑣瑣愧一經之陋有賢者在琅琅記三篋之遺蔚然秀峯得此益友伏惟某官秉家傳於黃石換仙骨於赤松兩上鄉書每為子大夫之首幾年侯類久傾衆朋友之心惟領袖之非難必紀綱之自肅子帥以正何嫌乎同隊之魚人得而輕則必有敗羣之馬欲覘所學奚止於文願言淡墨之題式快蜚黃之迅某官知其拙見謂之迂冠者五六人遡共詩書之樂山行六七

里喜聞翰墨之香不頌而規乃予所望

回徐學正

方秋崖

某思樂采芹訪醉亭之遺墨相從汗竹有虛榻之老儒
竊喜多聞敢問奇字恭惟某官深蔚琅琊之秀鏗鏘瑯
玉之聲真將軍而不侯信文章之無據妄校尉而得雋
豈遭遇之有時第觀雙鯉魚之書深識孤鳳凰之瑞知
吾心不可為功名累謂此學未易以言語求所見略同
起敬無數屈陪後進正賴老成人之典刑翹跂前脩勿

慙古君子之操履某奚師之敢匪友莫交費此公餘恐
已孤門外之尺雪談到聖處當胥晤席間之丈函遐想
金相庶幾玉我

回曹直學

鄭雪巖

某采芹藻之香何幸相從於衆楚挹芝蘭之秀孰云無
缺於百參睠然裁絨喜甚折屐伏惟某官妙六義四始
之旨遺一唱三嘆之音獻賢能之書于王有嘉薦鶚升
俊秀之士於學增重堂鱣惟此子衿言觀領袖必操履

之正者豈辭章而已哉識字幾何驚異言之太甚持身
惟謹喜允說以相資式遄甲乙之科少售辛勤之志某
蚤遊諸老自守一癯學不講德不脩敬佩聖言於洙泗
年相若道相似每慙師說於昌黎何以見規竦然改聽

回趙校正

鄭雪巖

某問訊二三子雅聞趙日之溫緬懷六一翁遄奉郇雲
之麗士氣振矣我心寫兮伏惟某官蘭猗猗而自香菊
鮮鮮而獨秀少日雕蟲之賦慨壯夫之不為今者伯魚

之詩幾古人之可到靖惟吾道匪在陳言蓋此心即堯
舜之心其所學必周孔之學儒之謂貴君豈苟云若徒
疲精於摘章繪句之間何以得意於含英咀華之外斯
文闕百聖之統覲明辨之盛名題千佛之經特餘事耳
某了無器局奚以範模人之患在為師其惟歛衽古之
學者為已當共書紳深幸得朋無忘規我

回薛集正

方壺山

某幸甚論交睽然辱問師道不立久矣以我奚為人心

所存者何惟子之勉如但優於分數正恐失之毫釐見
所見聞所聞是之審耳德其德道其道亦焉取斯不曰
文乎又其細者

回劉學錄

王實齋

某得劉公一紙書知為畏友笑邊生五經笥敢曰吾師
願從山水之間共尋文字之樂伏惟某官刊落訓故深
繹典墳歲貢鄉曲英已快雲天之橫鶚妙在言語外當
為學海之老龍若徒擷其葩華恐自枯於根本正不必

泥古人之糟粕甚至於以箕子為妄滋言觀訓誥誓命
之文要識唐虞成周之際庶乎有得奚患無聞某技止
黔驢璞如鄭鼠鏘悔菴之遺響敬佩贈言訪醉翁之舊
遊倚需投分尚邀傾倒相與發揮

回丁學錄

方秋崖

某薄言采藻甚慙斗北之魁孰與藝芳乃得易東之彥
於樂泮水美哉儒風伏惟某官孤鏘雅頌之音遙佩文
章之印秋天兩鶚行輩終無以易堯寒夜聚螢問學當

期於肖孔如曰咄畢而已何啻淫哇之為詩正而葩言
掇其實溢為翰墨豈瑣瑣於蟲魚深入性情勿冥冥於
蟬蠹審爾則一第之溷子將又有三年之驚人某奚有
師資喜於友直胸中國子監此言何為及我哉心在醉
翁亭暇日相與談經耳報瓊焉禱母玉爾音

回苟學諭

方秋崖

某茲奉翰題如聞談緒讀瑞芝記有嘉張孝子之門溯
慘栢亭願識魯臧孫之後儻無忝於乃祖足增重於吾

儒科目區區胡為歎造物之兒戲節誼凜凜當不負故家之父書惟其勉之行胥告矣

回蔣學諭

方秋崖

某辱書感甚啓讀竦然見一刺史即周孔之曾何幅尺非大丈夫無趙孟者枉以直尋其孰敢當抑子之過求之方冊願毋忘燈火之一寒安得圓機亦欲扣風煙之三逕言之喋喋意則拳拳

回李學諭

鄭雪巖

吾子少而好賦早已升堂獨學陋而寡聞不量掌泮忽
景星之快覩承明月之暗投不鄙而來適諧所願恭惟
某人綆汲文派穎脫塵編諒應皎皎以弗污故多落落
而難合旨趣甚遠要追作者之風步驟不凡肯墮諸人
之後未離豹隱猶混雞羣尚歛挹其有餘將琢磨而求
益買臣行膺富貴當可之時相如足比風騷豈終於困
某已疲織組聊寄跼蹐凡少年涉獵之為皆大道穿鑿
之病方期取正於韓襲和於李豈徒折艷於屈薰香於

班斐然而成復之有愧謹毋足學恐成刻鵠之非歸有
餘師當悟飛鳶之樂

回彭學賓

李梅亭

觀國之賓顧出習鄉之齒愛人以德何勤博我之文一
緘惠然三復感甚恭惟某官夙充岳貢見謂楚材子佩
明經詎肯受安昌之薦錢鏐好古祇欲為孔子之徒行
膺拾芥之科寧久采芹之客某自慙學落更愧名浮憂
則違之賴不失黔中之上佐士之仁者當或憐澤畔之

大夫

回曹學賓

方秋崖

某辱書懇懇荷意渠渠有老成人願言苦口雖前進士
亦所甘心乃獨嗟鬢底之霜猶未參門外之雪作賓于
學豈曰佚老云乎哉求道於經匪惟戒得而已矣敬當
洗耳毋憚費辭

回周糾彈

方秋崖

某辱教之及荷意甚厯糾豈易然是謂一學之風憲身

率先耳母羞諸子之月評跂相觀於俎豆之間要自得於翰墨之外功名入手何哉足以為重輕歲月到頭勉矣擇之於賢否匪伊胥晤共話所懷

回湯掌儀

方秋崖

某猥辱長牋備聞高誼師道不古今直章句之云儒行無他亦曰綱常而已嘉與吾黨深跂前脩抑抑威儀子勿俄於側弁袞袞臺省吾何歉於無氈少須拱揖之間覘見藏修之益

回何掌服

方秋崖

某荷君雅意貽我長牋君子其正衣冠禮在司服吾身
不願文繡言可書紳求之名義之間豈直出納而已行
胥告矣將不下帶而存審爾勉旃適且振纓而起聊以
為報率然有慙

回姚掌膳

方秋崖

某未見芝眉遽勤藻翰飯蔬食而樂乃屈司饗懷簞瓢
之憂不幾糜廩益有舖啜者可為慨嘆焉瞻彼炊煙羣

然而至何哉接浙翩矣其歸幸以此而告之是亦君之職也

回崔掌器

方秋崖

某茲奉音郵如獲晤語禮藏於器無徒曰俎豆之間情見乎辭已相知筆墨之外審自期止於富貴則所學奚以綱常君弟安之軒冕倘來耳吾苟可矣山川其舍諸敢以此言復之司聽

回蔣司書

方秋崖

某區區何似挈挈此來勝已之士與游豈無愛助非聖之書不讀喜有司存度而藏之職在是矣如識拜六經之義孰敢取携少須從諸子之間共為尋繹略茲占報莫既願言

回蔣教諭

方秋崖

某暫留烏幕翹想鱸堂凡我友朋辱寄好音於尺素咨爾庠序已銘雅意於寸丹何當袖司馬穰苴之書共講伐單于可汗之略多文以為富式竚逢辰患行不能修

豈無知己如但穿楊之技恐辜采藻之詩

回徐齋諭

某濫塵經席端奉書函患在好為師已切式微之歎未
有不須友敬歌伐木之章敢致贈言因以報貺挑達而
云挑閨豈真誤歟弄璋而寫弄璋恐貽譏矣幸毋憚蠅
頭之細更詳稽馬尾之訛

回學職

劉後村

求民之瘼方思百里之憂友士之仁必考一鄉之善有

來華問良慰素心伏惟省元學遠有源才高無敵餘子
莫不辟易避秋賦之先登主司無乃冬烘致春闈之未
捷顧修名之方起何一第之足云某偶試絃歌復親衿
佩逢臨邛之客僕敢不共熏晉鄙之人子宜自勉

回學職

方壺山

長邑於斯曰師則吾豈敢入邦而問願友其士之仁初
疑甚荒喜有足語某人學該千古行表諸生樂長才於
魚泉恬未肯仕跨巨翼於鵬海怒而奮飛亦使叢桂之

科名知有上杭之人物某行闕縣境欣聆書聲為儒通
今勉策勲於寸鐵自我作古當大刻於堅珉幸以吾言
勉諸同志

翰苑新書續集卷二十五

欽定四庫全書

翰苑新書續集卷二十六

賀正類

賀嗣秀王

師撰正

李梅亭

斗攜龍角又頒羲仲之春雪滿兔園請賦梁王之壽恭
惟某官宗藩明德政路宗班慶襲璿源默應璿璣之運
寶分玉帶益調玉燭之和宜從桃萼之辰丕介椿松之
祉某愧無善頌可賀履端曳鄒陽之裾方規旅進授司

馬之簡更佩謙光

賀史丞相正

李梅亭

鳳紀更端復對戊寅之厯龍躔回次又新甲乙之司時
維元勲坐膺純嘏恭惟某官勲高王室忠簡帝心以道
德而位三公應千載明良之運理陰陽而遂萬物成十
年生聚之功宜誕受於春祺用永扶於皇極某一違鈞
範五見歲華身在西陲阻效椒觴之祝神馳東閣輒輸
竹簡之誠

賀周丞相正

黃竹坡

玉燭調元和式歸於燕谷銅儀觀象序爰正於夏時有
如耆英茂介繁祉恭惟某官三朝元老百世宗師收歛
化工如四時之成歲照臨鄉國先一氣以回春惟賢業
之對時宜天休之滋至某濫紆尺組託茫萬間行伸再
拜之私先上一牋之敬受天之福惟日不足敢伸善頌
之詞履新之慶與卿等同傾覩上公之禮

賀丞相正

方烏山

鳳歷瑞頒鴻鈞氣轉皞皇用事換新歲之韶光魁宰調
元迎太平之嘉會三陽鬱勃萬宇光輝恭惟某官伊呂
門風禹臯地位同氣慶一堂之聚光輔乾龍包荒來四
海之英助成泰象剛辰茂對純嘏駢臻某叨備承流恍
驚改歲煌煌袞繡莫陪班見之儀楚楚旌麾重拜陶成
之造欲仰裨於變理尚勉布於中和

賀鄭參政 曾樞密正

李梅亭

三陽交泰驗正月之始和五福照臨瞻輔星而有耀宜

介簡穰之慶用彰弼亮之功恭惟某官德協春溫氣排
冬凜參贊陶鈞之化曾云樞機之柄允釐百工沈潛帷幄之謀
折衝千里宜對青規之旦亟登黃閣之榮某一自西來
五逢朔易吳蜀萬里末由稱壽於椒觴蕭曹同心所願
垂光於竹帛

代魏邸賀政府

陳賁牕

麟筆書元繫萬化循環之本義又畫泰屬三陽彙進之
初時維兩地之崇翕受層霄之祉某官望隆碩輔道備

真儒行夏之時朔九重於密勿班春之令扇八表於冲融屬三百六旬交會之初正二十四考權輿之始倚登玉鉉永輔絜疏某忝綴近宗幸依閱覆頌椒有喜阻陪賀筭之爭先削牘無文惟祝化爐之不老

代皇弟賀西府

陳質廳

元日為三朔肇迎更始之辰閏月定四時倣正歸餘之候裒是履端之殊祉壽于宥密之耆英某官格帝道尊亮天業棼風生帷幄朋來借箸之籌霧霽邊陲一定止

戈之略屬臨穀旦共紀椿齡謂久居四輔之間宜高致
六符之上首扶乾健永迓泰亨某夙玷近藩切依洪化
栢椒惟舊雖阻陪獻歲之儀桃李方新尚慨望逢春之
渥

賀史侍郎

真西山

六琯吹葭肇和氣於嚴凝之旦一麾分竹正雅歌於閒
暇之時與造化以同流致休祥之具介恭惟某官蟬聯
望闕豹尾高班蓋世聲名已見昭垂於日月濟時勲業

金史卷二十六
尚須整頓於乾坤宜繼襲於家範猶屈臨於侯服袴襦
流詠稔聞奏最之良鼎鼐登庸端藉調元之妙某受厘
治境竊祿真祠亞歲薦祥莫預霞觴之捧公堂稱壽第
憑霜藻之修頌詠惟深染濡罔既

賀程內翰

真西山

地稱潛府最雄南服之山川天惠仁侯來布東皇之德
澤和聲交播第祉自臻恭惟某官以道德人為文章牧
政先愛養霈然膏雨之蘇枯令肅貪殘迅若震霆之起

蟄即宣化承流之施設見調元宰物之規模願協泰交
亟歸鼎輔坐使蒸菌之槁亦蒙吹律之春某適以扃門
莫繇賀厦飲屠酥而醉已同農畝之人稱兕觥而躋莫
上公堂之壽

賀制置安撫

李梅亭

太歲在辛令豫享於三甲吉日維戊春先撫於五辰相
維玉帳之籌對越璇璣之運恭惟某官川流敦化山立
揚休仁行而春為青規而圜萬物剛養其氣轉洪鈞以

壽八荒聊賦顧兔追龍蛇之詩更均蠶叢及魚鳧之福
問訊梅邊之味亟催花底之朝某辱比陳人尚棲故壘
千林有喜固忻捲賀燕之簾三徑就荒已願返屠羊之
肆

賀諸司正

李梅亭

庚寅孟陬六十齡之復見甲子朔旦四五紀之罕逢其
在皇皇之華宜膺簡簡之福恭惟某官德潛天粹政播
民和圓萬物以青規之仁厥臨孔惠轉八荒於洪鈞之

氣其泰大來盤既頌於椒花戶益蟠於桃實某得州斗
絕觸緒冰寒多且旨旨且多不敢貢茆柴之釀熾而昌
昌而熾但知祝椿栢之祺頌俟惟深敷陳罔既

賀監司正

王臞軒

日月初躔星紀復回於赤奮地天交泰雲墟益播於青
陽時惟六轡之華茂輯百嘉之慶恭惟某官德潛剛克
道配陽休繡斧旂旂暫勸楚鄉之農事瑤車玉軼還逢
湘水之孟陬仁風轉蕙以汎蘭善類拔茅而連茹某三

年黔佐萬斛緇塵破崖岸而為文丞詎復敢喧於櫪馬
瞻原隰之有華使尚祈出送於土牛

賀趙運使正

彥覃

鄭雪巖

寶歷授時當五年之再閏皇華將命宜一歲以九遷天
地屬開泰之辰賢哲集非常之慶恭惟某官博厚寬大
明允篤誠仲尼元氣顏子春生親得西山之丰韻廣平
陽和成季愛日散為南浦之嘉祥不待原隰之驅馳盡
達閭閻之幽隱雷震林而啓羣蟄雨田毛而樂寬征一

轉洪鈞增華翠節瑞書太史光騰使者一星詔下紫微
召對文昌八座某薄言采芻莫效持椒已辛魯東家數
仞之依敢効曾南豐辦香之敬簷花夜雨未憂獨冷之
種沂水春風願鼓詠歸之瑟望雲矯首伏楮馳神

賀曾提刑年

戴象麓

伏以紀協歲月日星元氣四時之更始刑布邦國都鄙
福躔一路之增光肅對昌期恪陳善頌恭惟某官精神
月霽節操水清翦惡鋤奸蕩滌五陰而剝盡緩囚恤獄

宣導三陽之泰和人人熙鬱孤之臺物物秀崆峒之野
不特蘇爾民於凋瘵抑將壽吾國於靈長百雉風行無
愧漢六條之舉一門鼎盛亟登周四輔之聯某久戴二
天欣逢元日迹雖縻於霄壤心實係於星霜種李栽桃
自幸日棲於鴻庇頌椒銘栢願言天賜於龜齡頌詠之
私編摩罔既

賀彭提刑年

戴象麓

伏以厯象日月星辰元氣四時之肇始刑布邦國都鄙

福躔一路之增光恪對初元肅陳善頌恭惟某官精神
月霽節操冰清寬澤滂流潢浦久霑於雨露先聲轟隱
曲江新播於雷霆暫移天上之台符來秉人間之使節
民喜伸眉之有日吏皆重足於寒冰繡斧風馳行試丹
書之筆絲綸日近即趨紫橐之聯某久戴二天欣逢元
日迹雖縻於霄壤心實係於霜臺種李栽桃幸忝一株
之舊物頌椒銘栢賸祈千歲之修齡頌詠深深編摩罔
既

賀提刑年

戴象麓

伏以龍躔肇歲鳳厯頒春皇帝甲午改元重見淳熙盛
時之事君子衆陽交泰載歌慶厯聖德之詩維時間生
與國同慶恭惟某官氣鍾五岳德備四時素深天庥之
知暫屈星輅之寄雷風新令掃除溪峒之窮陰雨露至
仁轉作江山之和氣茲順臨於華籥宜懋輯於蕃禧一
雪兆豐年已慶來牟之瑞九天揚渙號佇觀茅茹之征
某方依夏屋之新倏見春規之轉壽筭莫伸於椒頌慶

函輒贊於蕪辭遵守新條烏敢怠農桑之勸課歸依大
冶所願同桃李之栽培頌詠維新敷宣罔既

賀王知府年

戴象麓

歲更鳳琯一年時令之從頭春到魚城千里陽和之有
脚鴻禧懋輯燕賀維勤恭惟某官胸襟叔度淵波標表
瀛溪霽月昂昂令聞山斗具瞻隱隱先聲雷霆衆聽厘
氓相慶傾心膏雨之霑刻吏竦聞重足淵冰之立踴躍
道塗之喜懼呼父母之來矧穀旦之肇新宜藩釐之茂

介開藩指日雖歡迎朱旆之臨出綽自天恐又下紫泥
之召某行依夏屋倏覩春規末繇申栢頌之忱姑僭飭
楮生之敬牛鞭將動願承課教於農桑鴻茫焉依尤望
栽培於桃李其為頌詠罔既敷宣

賀葉都鈐年

戴象麓

歲更鳳琯一年時令之從頭春滿虎城千里陽和之有
脚鴻禧懋輯燕賀維勤恭惟某官吾道宗師斯民命脉
充聖賢涵養之定力布帝王惠恤之寬條日課農耕麥

秀崆峒之野風和兵壘柳環章貢之城矧當麟經謹始
之初宜叶龜畫大來之吉分符剖竹暫煩撫字之勞簪
筆持荷行造論思之列某方依夏屋倏轉春規無階栢
頌以稱觴敬飭楮生而贅禮牛鞭將動有年喜驗於農
祥鴻庇焉依指日願歸於化治其為頌詠罔既敷陳

賀通判年

戴象麓

歷日頒元忻際三陽之泰屏星增重楸膺百福之升式
對昌辰恪陳善頌恭惟某官炳炳文章之鳳振振信厚

之麟聞望顯印胸襟冲粹共仰泰山北斗平分霽月光
風屬鳳紀之更新宜龍光之鼎至歌騰康海想驥足之
難淹詔下自天佇鵬程之直上某幸依夏屋倏轉春規
無階修敬於壽觴謹用披誠於慶牘春生別駕薰陶分
屬邑之輝日奉辨香耆艾頌閔宮之詠

賀檢法年

戴象麓

正月一日為元鳳歷謹聖人之始下乾上坤曰泰龜爻
占君子之亨宜對剛辰茂膺新社恭惟某官氣鍾溫厚

性備中和青天共指其至明綠水尚煩於共泛德隨日
進事與春新茅茹相連增吾道之光於初長椒觴再舉
壽斯文之脉於無窮某誠係崇墉身縻小邑履端舉正
賀忱方阻於面陳搦管裁牋善頌徒勤於心拜其餘暇
嚮罔既編摩

通州府年書

方秋崖

閭闔開黃道聿新鳳歷之元燕寢凝清香誕輯虎符之
瑞春融族管頌浹椒盤某官氣函玉燭之和識造璣衡

之妙昔無襦而今袴汗青遒紀於竹書言如絲而出綸
泥紫已塗於芝字地天之泰朝野所需某三見奴訾一
歸垓北雲深戟衛諒鳴璆蟻泛之春日轉觚稜覲鏘珮
雞人之曉中和之詠熙皞惟鈞

通判

方秋崖

春皇撫宇宙聿新鳳歷之元霽色滿乾坤誕輯熊幡之
瑞雲酣族管香沁椒盤某官氣涵玉燭之和識造璣衡
之妙治中半刺史喜光風霽月之平分新安古富州覺

練水屏山之增麗於皇渙渥式對泰亨某三見姬嘗一
歸垓北暖融泥軼諒鳴璆蟻泛之春晴轉觥稜覲鏘佩
雞人之曉康沂之詠屬邑惟鈞

教授

方秋崖

春皇撫宇宙聿新五鳳之元霽色滿乾坤誕輯三鱣之
瑞雲酣族管香沁椒盤某官發括山煙雨之奇浥石門
洞天之秀捕龍蛇搏虎豹駭觀昌黎奇怪之文騎麒麟
翳鳳凰雅有周公太平之略猗歟紫綉美彼青規某遙

遡匿犀敢忘傳鯉先生自此升矣春浮栢葉之觴館下
立而誨之雲麗槐陰之市東丹所屬楮素奚彈

幕職

方秋崖

經謂一為元瑤歷更新於族管陽內三為泰瓊琚盛集
於蓮池時若青規誕敷紫綵某官識造璣衡之妙氣函
玉燭之和幕府粹精不妨尋練水屏山之勝江城寥泬
豈久稽粉闥瑣闥之遊肆及正陽煥流春澤某陸沉僚
底三易歲端浮蟻沁栢葉之香莫塵燕廈朝馬踏梅花

之月端觀鵝墀其若東丹難窮楮素

回景獻邸賀正

方秋崖

歲紀旃蒙丕對一元之始晨趨閭闔有開萬象之春於
穆青陽介時朱邸恭惟制行信厚秉心塞淵識參義易
之占履而後泰學謹麟經之法正次於王與宗國以同
休交地天而錫羨某嘗陪講席敢後慶函闕矣晤言恍
三山之如舊尚其問學與六籍以維新

回吳總侍年書

方秋崖

風轉青旂肇布王春之令天開紫橐誕敷帝皞之仁通
有蕃釐介茲茂德某官星避南斗筆回東風才名當世
之少雙上虛佇之久矣江山天下之第一民歌舞者再
焉及此端辰聿來異數盍簪而喧櫪馬想忻奉於潘輿
飛墨而落詔鵷竚趣歸於漢殿某又逢穀旦載頌椒盤
北固樓臺正隔濤江之雪東皇宇宙幸連淮海之雲願
言節宣昭受渙渥惟精調於鼎食斯亟慰於巖瞻

回王知軍年書

方秋崖

青旗催曉通新鳳歷之端皂蓋班春誕輯虎符之瑞某
官慶流戟衛恩浹邊城式遘尺一之需懋對內三之泰
某濫塵烏幕肅奉魚書遙瞻竹使之華已後椒花之頌

荅程府教賀正

方秋崖

歲在作噩天開用九之乾正于孟陬春洽內三之泰聿
來墨沼起我筆峯恭惟有祕畫前無虛名下騎長鯨而
訪白將薄遊芹水之宮駕飛鳳以凌清當徑上芸香之
閣橫經何日用易一元某雲卧草亭風傳椒頌千金裘

五花馬莫酬尊酒之細論尺素書雙鯉魚但愧美人之
遠意

回潘宰

方秋崖

閭闔天高蒼籙開而一元始河陽地暖洪鈞轉而萬象
春維時履端既多受祉某官大族之動孟陬之和妙彈
單父之琴端歸鳬舄徑造承明之殿親發獸樽某自放
還山久不蓄幘壽之栢酒無手版之倒持寫以竹書有
背芒之若負

回學職士人賀正

李梅亭

杓檣龍角魁枕參維氣轉洪鈞歲躔益部其在藻芹之
秀聿觀茅茹之連恭惟某人文艷春葩香浮秋桂百步
楊葉不難雕鶚之穿三月桃花即看鵬鵬之化不負旦
評之望即先天老之題某方欲修辭先勤委贄習鄉上
齒何幸陪庠序之申重席說經尚幾見賢能之獻

賀瑞守游寺丞正

胡提幹

當天地交泰之日嶰竹回春廣雨露滲漉之天盤椒沸

頌均弘十萬戶之樂贊咏二千石之良某官山立揚休
川流敦化幕院有勿剪之木增光喬木之故家劬池多
可製之荷行復紫荷之盛事裒碧落堂之瑞以及物推
皇極主之福以錫民接咏騷謠深農畝春耕之未來年
此日帶帝庭夕燎之香某園迹洪濛賀稽盤辟拜丹井
清泠之賜有味山谷之言歌黃髮燕喜之詩但祝魯公
之壽

賀瑞守游寺丞正

王監稅

青規俶序占歲事之從頭紫陌朝天慶陽春之有脚蒸
出雙眉之喜薰為一氣之和某官資稟粹冲德全溫厚
農桑千里屢馳白鹿之車綸綍十行催扈蒼龍之駕行
膺舉接茂對泰交月寺歸班光動錄屏之姓字春旗簇
仗榮躋持橐之清華某幸際履端深懷旅宅望五雲於
黃道莫由銘栢以頌椒轉一氣於洪鈞更覲拔茅而連
茹

回瑞守游寺丞正

厲制使

采勝放春喜併椒拌之賀朱輔閱歲豐培棠舍之陰順
履昌期茂迎新渥某官資涵玉粹智協規圓燕寢凝清
香兵衛久森於畫戟閭闔開黃道衣冠行拜於紫宸某
未飭慶緘先勤寄驛愧無妙語和調觴賜栢之詩行遣
穹班侍羅帕傳柑之宴

翰苑新書續集卷二十六

欽定四庫全書

翰苑新書續集卷二十七

賀冬類

賀丞相冬

方秋崖

荔挺芸生一陽初復柳舒梅放萬象皆春有皇播物之
仁盡入迎圭之景某官識參造化德備中和衆正用而
小人消君臣胥慶羣陰退而吾道長天地開除一氣洪
鈞八荒壽域某藐為宗翰莫望台符垓北無垠但覺觀

臺之雲暖太平有象永依化國之日長

賀丞相冬

方秋崖

天地開除一陽生而羣陰蟄國家閒暇衆正進而萬象
春某官行孔之春學顏之復經綸天緯有開剛長之休
闔闢神機盡屏私邪之沴皇明所燭景福來同某藐是
宗享莫瞻台極春浮緹室已先南北之枝雲爛袞衣徒
跂東西之府

樞府冬

方秋崖

日行北陸六琯初飛雲麗西樞五兵不試於皇亞歲克
相明時某官舒為慶雲溫如愛景顏氏之復萌動一陽
孔聖之時會逢千載與國無極對天之休某免牘未俞
慶函敢後耄之及矣惟有賦歸歌以訊之亟其爰立善
頌無斁德音不瑕

宰執冬

方秋崖

曉奏觀臺蒼籙紀五雲之瑞暖回宮壁洪鈞轉一氣之
春維時元臣克受蕃祉某官履日月之會見天地之心

坐廟堂而進退百官盡消羣惠幹造化而開張萬物潛
復初陽茂迎愛景之長有衍丕圖之慶某屬分相寄遙
企階符天子之宰通神明諒臻純嘏太平之期當今日
式對亨嘉

侍從冬

方秋崖

霽景浮空雲紀魯臺之瑞初陽襲煢春回鄒谷之寒有
偉禁班丕承帝賚某官蒼玉粹秀黃鍾函和擇一中庸
消羣惠於六陰之極與衆君子致亨期於七日之間嘉

此迎長既多受祉某謬將使指莫賀賓榮煖入孤根已
動揚州之梅興曉傳殊渥喜聞詞掖之芝香

賀提刑冬

戴象麓

周歷頒新忻際一陽之復漢軺倚重懋迎百福之升式
對昌期恪陳善頌恭惟某官氣鍾博大德韞中和霽月
精神允矣朝廷之瑞福星華采熙然原隰之春矧當律
動於黃鍾轉覺光生於繡斧日添紋線已催補袞之工
夫春上暖枝行繼調羹之手段某叨庇二天之久遭時

七日之來愧阻奉於壽卮輒敬申於慶牘薦紳競慕孔
北海願事大賢辦香敬祝曾南豐俾膺多福其為頌詠
罔既編摩

賀提刑陳寺丞冬

鄭雪巖

陽來七日可覩道長之機治應期年已著風清之效黃
鍾一動繡卽增明恭惟某官氣養直剛學根純正文騰
五色交輝雲物之書祥令信四時允合歲功之有序自
六轡如絲之在手覺三軍挾纊以歸心籌密運於戶庭

之間情自得於江山之外霜露無非教豈專肅殺之威
天地大曰生中寓孽萌之德空冠巢於乘雪振王旅以
如雷羣陰力排萬彙氣吐茂對復亨之盛豫占鼎輔之
華某分教無能受知特異孤根培植喜逢梅嶺之先春
暖律吹噓頓釋芹池之獨冷沁月毫而展敬望雲宇以
馳神

賀運使冬

至節是月之朔

戴象麓

祥開周歷日同至朔之謂章光動漢軫星出虛危而為

福正人天相陰類冰消幸適際於昌辰爰恪陳於善頌
恭惟某官以六經澤行四時春天念江西十州罹兵火
之灾帝遣丰南一人活生靈之命雷風不終日掃除溪
峒之窮陰霜雪有至仁轉作江山之叶氣愛日屬履長
之始福星增臨照之華天意有開人事可卜日添紋線
已催補衮之工夫春上暖枝行試調羹之手段某奔馳
小吏鼓舞令辰阻陪壽筭之旁輒効慶函之上薦紳競
慕孔北海何幸福生蒙被明公之知辦香敬祝曾南豐

當効后山尊事前輩之意其為頌詠固既敷宣

賀黃運使冬桂

李梅亭

斗北中而建子厯肇應於周郊日南至而逢辛書允符
於魯觀維時英節茂擁休祺恭惟某官德配陽剛氣排
冬凜水解漕下既曉行湘水之春雷復地中即夜對宣
室之席諒應四分之牛晷坐齊七政於龍魁某材乏綫
長分甘車副儻憐紫陌看花曾綴於馬蹄雖在黔山吹
黍固希於鳳律

劉徽州冬書

方秋崖

雷在地中復葭飛緹室之書子為天之正梅浥練溪之
煖懽騰燕寢頌決鯨尊某官聲名黃鍾之和文物清臺
之瑞朝崑崙夕玄圃豈但曰一二千石之良左浮丘右
洪崖乃肯賦三十六峯之秀於穆袴襦之最有來綸綍
之褒坐而堯言進而舜趨已覺觚稜之天近前有召父
後有杜母何知戟衛之日長某式對亨期丕承剛德紀
漢宮之迎至屢驚節物之崢嶸吹鄒律以破寒更探陽

和之消息其為瞻詠第劇蘊悰

賀彭知軍冬

戴象麓

日運璣衡忻際一陽之復星聯麾節茂膺百福之升式
對昌辰恪陳善頌恭惟某官以六經澤行四時春二千
石循良方徧作南安之化雨十四州證察又散為陳廣
之恩波屬迎愛日之長尤煥福星之采梅闕春早已漏
息於南枝芝檢星馳佇趣裝於北闕某久席二天之芘
欣逢七日之來稱觴上刺史之堂悵無六翮吮墨奏小

夫之牘徒有一忱愧與賀并意非言盡

賀瑞守游寺丞冬

陳袁州

黃道迎曦景驗周主之羨錦川宅牧香凝韋戟之清裊
是珍祺萃于華旦某官氣涵剛大德毓粹溫簪紱蟬聯
色復青氈之暖袴襦歡溢輝揚繡線之長小至標辰大
來揖慶某偶叨分土倏見書雲寶燭揚輝幸偕富鄰之
映瑤觥阻奉敢申彝禮之恭

賀瑞守游寺丞冬

雷臨江

黃鍾律底開生生化化之機錦水江邊集簡簡穰穰之
福和薰田里歌溢袴襦某官性稟慈祥躬行寬大朱轡
整暇惠敷愛日之溫畫戟光輝令布清霜之肅茂對葭
灰之應即催荷橐之持某謬領州符將周歲籥辛叨鄰
封之庇敢不知歸喜添宮線之長末繇趨賀

賀瑞守游寺丞冬

陳登

至望同辰雲薄翠微之曉陽和動地天開碧落之春維
承流師帥之尊膺自天戩穀之慶某官溫如圭日清徹

壺水田里無歎聲已洽袴襦之愛朝廷知治行佇放金
璽之褒昌期喜報於陽來盛德益嬗於剛長某棲遲百
里鼓舞二天指八百之長年遙祝凝香之燕寢詠五更
之三點即聞接武於鵷行

賀瑞守游寺丞冬

陳袁州

五色曉書倣獻魯臺之瑞雙旌夙駕清凝韋戟之香諒
對剛辰衷膺繁祉恭惟某官秉姿端亮毓德粹溫轉寒
燠於根亥思孚而洽權低昂於土炭政適其平挺荔標

時塗芝疏寵文三日近遙知宮線之添尺五天低趣侍
宸旒之邃某阻持壽筭已肅慶函乳酒之下青雲良深
戢惠淨繭之明玉雪滋媿報襄亟具稟訓仰祈矜察

賀瑞守游寺丞冬

陳袁州

周圭測景日增一線之輝韋戟凝香春入雙旌之煖維
時良牧萃只繁禧某官毓德陽明秉心冰潔天培碩果
騰茂實於禁林晝永愛棠泱歡聲於鈴閣竚趣鵷行之
入峻躋雞橐之華某蹟絆銅符光依寶燭侈貢儀於黃

襪又際剛辰庸寓敬於烏絲莫殫賀悃

賀游瑞州

包宏齋

昂星以正仲冬喜逢亞歲屏風之錄御史茂介殊休氣
應六雄和薰千里某官霜皮黛色玉壺清冰內寬外明
適森戟凝香之趣政平訟理沸昔襦今袴之謠茲占日
南至之祥即侍天北極之坐某偶兼漕輓幸託寅恭遙
瞻符竹之光無繇面會聊寄驛梅之信第劇心馳

賀游瑞州

趙運幹

六雄應律喜逢剛長之辰五馬生輝茂集大來之慶頌
聲洋溢和氣周流某官清映雪車光澄月壁黃堂畫永
運陽開陰闔之機畫戟香凝收時和歲豐之效煖回寒
谷人樂熙臺茲占雲物之祥即見天光之近某自慚短
綫仰贊漕冰遙企竹符莫遂捧觴之願寓忱竿牘聊存
獻履之儀未究賀悰等祈矜照

回寺丞游太守賀冬

蔡久軒

三辰珠璧方新漢史之占千里車輜宜有魯侯之頌伏

惟某官飛雪應枹鼓之政清冰照琳琅之姿吹律六雄
已轉袴襦之暖司儀三揖想懷圭蔽之連一陽初動於
復來五馬即膺於晉錫某何裨樞筦况拜函箋公事少
而諸縣豐自息祁寒之怨衆賓歡而太守醉遙知美景
之并端此控申切覲丙鑒

回寺丞游太守賀冬

陳袁州

鳳筦迎和瑞紀五雲之旦虎符疑最歡騰千里之春已
頡慶牘之馳過辱蜚牋之况某官貴名日起盛德陽升

正色立朝凜凜冰霜之操深仁宅牧生生天地之心鹿
轂開祥鵠行趣覲某光依鄰映道喜朋來獻黃襪以踐
長嘗彈爨頌袞烏絲而寓敬曷報更施感戢維深編摩
則淺

賀權府冬

真西山

氣應候臺動初陽之一晝光生使傳騰瑞彩於二星睽
迺鉅賢誕膺純佑恭惟某官慈祥篤厚博大醇明發於
一念之仁散作七閩之福倚須褒壘入侍凝旒某方此

掩關稽於賀厦茅簷畫卧但欣化日之長棠舍春濃更
藉仁風之播

賀葉都鈴冬

戴象麓

鳳厯迎長忻際一陽之復虎符倚重懋膺百福之升式
對昌辰恪陳善頌恭惟某官以六經澤行四時春推寬
慈愷悌之仁通天為一順消息盈虛之理與時作新屬
當愛日之初長愈覺福星之增煥景添紋線已催補袞
之工夫春上暖枝行試調羹之手段某叨庇二天之久

遭時七日之來愧阻奉於壽卮輒敬伸於慶牘薦紳競
慕孔北海願事大賢辦香敬祝曾南豐俾膺多福其為
頌詠罔既編摩

賀本軍趙通判冬

戴象麓

天統肇初喜戒書雲之候星屏偕重倍增分月之光福
生有基朋來無咎恭惟某官仙源間瑞昭代奇英推慈
祥寬大之仁通天為一順消息盈虛之理與時作新屬
占迎日之祥宜輯自天之祐揮洒風煙之興暖隨彩筆

以潛回歌詠海沂之康聲與黃鍾而迭應况先得梅關
之信宜即膺芝檢之華某小邑備員大賢依茫稱栢觴
而介壽莫遂鳬趨修竿牘以馳誠少伸燕賀情深頌禱
辭約敷宣

賀史通判冬

李梅亭

葭律浮灰候臨小至棘評佐獄慶叶大來遠莫捧於兕
觥誠敢輸於魚素恭惟某官氣鍾溫厚德迪中和傑然
驥展之材監此龍潛之邸鸚鵡盃鷗鷀杓滿介壽祺孔

雀扇麒麟符即儀禁角某襪材線短泥軾冰寒乃分之
宜詎敢恥狐貉之側惟鄰是卜尚祈分燈燭之光

賀寓公冬

真西山

一陽潛復於黃宮肇迎修景八座觀頤於綠野茂對亨
辰宜有蕃禧來符盛旦恭惟某官氣全剛大體備中和
蚤遭列於嚴徐密裨旒宸晚尋盟於綺角高蹈林泉既
全蓋代之名宜獲自天之祐灰飛葭琯甫占紋線之添
詔下蒲輪倚被袞衣之錫某叨榮分竹竊茫鳴珂望夫

子之宮牆未皇趨慶賢人之德業敢後修辭

代通李制帥冬書

方秋崖

雷在地中復日增繡壁之紅子為天之正春麗油幢之
碧若時龍綽式對麟符某官聲名黃鍾之和文物清臺
之瑞長嘯而却敵騎喜鯨海之波澄高卧而護國門覺
蜺旌之雲暖方勒勲於汗竹肆委貺於浮葭琬戈淑旗
其視爾師鼃鼠已消於陰慙玄衮赤舄入趨王覲鳳凰
遙覽於陽暉某偶出師牆遙瞻帥鉞紀漢宮之迎至屢

驚節物之崢嶸吹鄒律以破寒難既襟期之磊砢其為
系頌第劇蘊悰

代通吳總卿冬書

方秋崖

予為天之正日屆南躔之景雷在地中復春連北斗之
魁喜緹室之律回覺總臺之雲麗某官天人三策禮樂
百年方排閭闔呈琅玕之奇鵷鷺集九霄之曉迺羞崑
崙薄蓬萊而去貌貅飽萬竈之煙要不為紙上已陳之
言姑將試胸中有用之學鼯鼠盡消於陰慝聿逢剛長

之休鳳凰遡覽於陽暉式對亨嘉之會某遙瞻卿月丕
戴使天吹鄒律以破寒覬放梅梢之煖朝漢宮而迎至
倚飛芝字之香其若頌言莫殫襟抱

回楊郡王冬

方秋崖

日躔北陸肇正天元春入南陽聿連帝畹黃宮浮煖紫
極流暉某官一氣之和五雲之瑞為國元舅自牧以謙
得易初爻不遠而復皇明所燭景福來同某久欲垂車
未遑削牘華星字字猥奉函書鬢雪莖莖第驚節物

回榮邸冬書

方秋崖

日長宮壁已浮葭律之春天近蕃房有韡棣華之鄂裒
時之對與國同休某有事紫壇未瞻翠水忽枉五雲之
翰謙以先之又添一卷之書復其亨矣

回景獻邸冬書

方秋崖

一陽萌動緹室春浮萬象張開藩房天近有偉亨嘉之
會聿開剛長之期某官自牧以謙不遠而復溫其趙日
歛為可愛之陽和倬彼魯雲要是太平之瑞氣對天之

佑與國同休某近別講臺遙瞻宗翰景長宮壁喜添一卷之書暖入圭躔茂錫百朋之祉

代回諸邸冬書

方秋崖

倬彼魯雲必書為瑞溫其趙日可愛如春維時宗盟自天第祿某官土圭之正玉琯之和于嗟麟兮式時公姓衆維魚矣裒對天休福履綏之君子樂只某明農未遂介壽無繇節物崢嶸第驚老朽文章爾雅徒負褒榮不敏之辭何足以謝

代回程監丞冬

李梅亭

灰浮縹緲新北臺太史之占雲卧衣裳添南極老人之
壽共惟某官襟懷霜潔談笑春溫未老得閑飽味桑榆
之暖久靜思動佇儀槐棘之班某莫捧兕觥過勤魚素
蒲萄一斗知公不為於涼州嶰竹數聲在我頓忘其寒
谷

回朱高郵冬書

方秋崖

雲深魯觀喜浮葭管之寒春泥秦沙已逼梅梢之煖亨

嘉之會剛長維休某官聲名黃鍾之和人物清臺之瑞
前有召父後有杜母何知戟衛之日長坐而堯言進而
舜趨但覺觚稜之天近有偉袴襦之最式造綸綍之褒
某辱以鯉書浮之螳甕有香搖玉第驚節物之崢嶸其
誼斷金莫既襟期之磊砢

回丘運使冬書

方秋崖

繡壁春融有永漢宮之日緹函曉襲聿飛郇翰之雲佩
雅意之相先愧頌言之已後此益某官文成唾玉誼重

斷金惠我雙鯉魚共善甘芬之錯落出呼五花馬弟驚
節物之崢嶸

回浙西王提舉裴冬

李梅亭

和叔正冬伯趙司至儀圖道長之慶允屬陽休之賢伏
惟某官清徹冰壺和鍾玉琯送之禮樂不離尺五之天
任以公卿即近丈三之日某無由面賀例辱手箋烹魚
得書莫報五雲之體拂龜端策但占七日之爻

回潘宰冬書

方秋崖

魯臺書至聿來七日之亨潘縣回春已上三年之最維
時綸檢式對緹葭某官有冰其相如日可愛暖入丈三
之景頌如之何徑排尺五之天會且歸矣某放還山墅
久典朝衣裹章服揖上官要非閒居者之事登靈臺認
雲物已候見尚方之歸敢修記室之辭往代掃門之禮

回光澤宰冬

方烏山

暖回葭室占日至於史官喜動花城美風流之令尹維
時麟趾介此鴻休恭惟某官標致層冰胸懷愛日一家

和氣光生天上之棣華百里歡聲青入門前之柳色對
陽剛之初復佇鳬爲之趣歸某當此先春喜其猶冷折
梅花而送使空感盛心祝若木之聯輝慙無善頌函歸
使驛寓訊便鴻莫稱先施伏祈寬照

回泰寧宰賀冬

方鳥山

陽生七日驗葭室之氣回地占一雷覺花城之春早維
時賢尹介此休祺恭惟某官色線才華黃鍾氣度琴無
俗韻真梨嶺之家聲筆有清吟得梅花之句法佇由剛

長即慶彙征某方嘆冷氈忽蒙溫續沉沉而動春酌悵
阻並游寂寂而撥寒灰曷酬嘉惠

回王主簿賀冬

方烏山

陽回葭室和滿花城喜動太夫人慶板輿之具至名聞
家主簿紛慶牘之爭先宜對剛辰茂膺繁祉恭惟某官
家傳姱節仕正妙年人言德度之粹溫光風霽月我見
丰標之凝峻寒露清水既候飛葭寧淹棲枳某喜其獨
冷慙此先春祭竈而請比鄰若為孤我升堂而拜壽母

惟有羨君亟具稟酬伏幾鑒察

回鄉官學職賀冬

李梅亭

聽六日四分之鳳律又見新陽詠五更三點之鴛行已
迷舊夢茲勤善頌但愧過情恭惟某官語染芸香氣薰
葭琯登觀以望自堪織雲漢之章閉關而居亦足驗地
雷之卦某寸材線短百念冰寒井底之陽未回若為觀
復江上之容獨老良感相親

翰苑新書續集卷二十七

欽定四庫全書

翰苑新書續集卷二十八

贊見類

見丞相

代人

王臞軒

茵塵埃之下吏夙感大恩拜雲漢之上台輒裁小牘戴
德有丘山之重修辭無月露之工斐然搖豪滂若流汗
伏念某妄庸晚進艱苦早孤念昔先人固嘗拜龍虎之
榜不腆後嗣何敢吐蝸蚓之科然徒用外家之恩幸得

塵下士之列頂踵實歸於陶鑄肺肝嘗切於鏤銘甘辭
曹掾之優聊適步兵之隱經禮三百亦嘗偕計吏之行
進士五千獨未中太常之第猶蒙藏疾獲遂養痾侵尋
二考之書濩落再命之計然念長伯樂之廐苟不自鳴
縱或抱和氏之珍誰其見賞敢伸九頓首之請併祈一
轉手之仁恭惟某官直大以方清和而任時則有若伊
陟實繼阿衡之覺先公其惟時成周足邁伯禽之拜後
積十六載更弦之化收七十城憑軾之功營東甌西煩

整頓乾坤之手燕南越北知扶持宗社之心方將恢萬
世之基益廣開衆正之路有如門下桃李之數或堪籠
中參朮之儲是能容之非敢望也尚念某難留氷幕盍
迂糟丘一氣之轉洪鈞倘拜成終之賜萬間之庇寒士
敢忘報國之心

上任中書

楊誠齋

披雲漢之天章夙見舍人之樣勒山林之俗駕來瞻學
士之真極知大匠之門難飭小夫之牘顧無藉手輒用

引吭竊聞師儒並世之難類有今古殊時之歎韓昌黎之於太白漫夜夢以晝思陳後山之於大蘇恨江空而歲晚今有文章之伯實在邦域之中公求士甚士之求公既聞命矣後視今猶今之視昔盍往拜之伏念某氣懦弗張骨凡難換一科十年之不補愧在無聞半通五兩之甚甘止於為養曾幾何日竟失所天陷皆腐膺僅能逃死磨肌戛骨奚暇送窮祥琴翁忽以成聲塵甑睢盱而望賜心口相語但欲從小宰之銓面目可憎未敢

作大鈞之問惟是忍見賢之渴所當修覲德之恭或聞
庸下之姓名已辱暗中之摸索逢人必項斯之說幾於
神比而天同伴直難浩然之呼特以職親而地禁仰高
山之景行感流水之賞音樂莫樂兮相知安有又傲翰
林之理見所見而後去姑慰不願封侯之心恭惟某官
學冠儒纓道航聖瀆家故雄於四蜀誰敢齒於諸任騎
鯨暫駐於九龍振鬣遂暗於萬馬周情孔思心傳先聖
之不傳宋艷班香文到古人之未到久於詳試昨乃造

歸士則快於覩先帝已嗟於見晚能典朕禮咨伯直清
肯從吾兒煩君調護玉堂草罷又吟紅藥之翻金匱紬
餘還對紫薇之伴彼智効一官而不足此身無數器而
有餘人望一條之冰其容已肅公傍九霄之月所樂不
存豈非為天子之私人實持公議行且作清廟之近弼
尤佩遠憂今外敵訐阻之時正中國圖回之日天地亦
大矣保邦當在於未危人物方眇然求才不嫌於太廣
與其待倉猝而市三年之艾不若及閒暇而滋九畹之

蘭時來為之天下幸甚某貌無可贅輒誦所聞幽桂遺
榛管底敢累犯嚴之口江梅托桃李但欲薰自潔之香

上傅侍郎

劉後村

卜江左之興衰久闕衆望數襄陽之耆舊今有幾人公
方與造物者游我欲順下風而請切以士苟有志皆知
名節之可尊生不同時每恨先賢之已遠覽范滂之傳
至太息以興思聞杜喬之風想生氣之猶在至若嗣正
始諸公之絕唱主過江多士之齊盟蓋凜然尚有於典

刑乃前此未承於聲歎良以服膺之切非為炙手而來
恭惟某官一代宗師三朝壽雋精忠諒節可居周堪劉
向之間讜論危言不在陸贄陽城之下頓簪諫筆垂秉
事樞而乃預憂十常侍之弄權歷指七貴人之盜寵一
壑徑歸之甚勇六丁力挽而不回政坐名高未許卷而
避世假令耄及猶當杖以造朝况才之壯而意之新年
彌高而德彌卽聖上放綠綈之詔國人佇赤舄之還既
彷徨懷宗周之憂尚終始抱東山之志舉世之人皆濁

惟我獨清天下之父來歸其子焉往願趣蒲輪之入徑
躋鼎席之榮伏念某實類癯儒名為胄子讀書萬卷頗
馳騁於古人泣血三年盡變移其故質憂哀憤恚之所
侵蝕疾疚思慮之所耗昏何辜於天亟奪其父素琴絃
絕誰憐中散之孤鄰笛聲哀忍誦山陽之賦敢意高賢
之雞絮尚臨委巷之雀羅得非憫泉下之人昔嘗忝座
上之客危衷易感悲涕無從頃瞻紫氣之來念快景星
之覩維先生長者實晚學之指歸矧大父老人有鄉來

之雅素倘或予互鄉之潔必少慰若教之蒐進之於琴瑟書冊之前誨之以洒掃應對之事縱未窺於閭與終不畔於門墻誓墓之餘非敢望山公之啟事振衣而進所冀聞夫子之文章

上魏運使了翁

李梅亭

聞宇宙之大名如瞻喬嶽抱江湖之渴夢今在下風乏紹介以為容修辭誠而求見某聞士之任重固不止獨善其身儒者道高先當知有貴於己若靡然斷趾以適

屢必至於舐痔以求車操行既卑國家何賴雖有卷舒
之際不為燥濕所移如蘇文忠之違熙豐亦不苟同於
元祐若劉忠肅之惡章蔡然非強附於伊川是名蜀珍
可重趙鼎觀公氣象視古等倫茲故賦明月烏鵲之詩
亟欲快景星鳳皇之覩恭惟某官眼高四海胸著千年
漢相有真宜居蕭曹丙吉之冠鄭公所願蓋在稷契皋
陶之良當炙手可熱之時凜掉頭不住之節長卿甫還
於巴路元濟已叛於蔡城神山可巢固自薄蓬萊而不

即櫓槍未落必欲借荆楚以同功雖卒成孺子之名然
已立懦夫之志一麾而出十暑于茲回視獨對三千字
之人誰肯甘頓十九年之刃萬牛不能回丘山之重四
牡又復勤原隰之馳要路在前聊養韓忠獻之器榮進
素定何必王文正之門然海內所以屬望於公益天下
尚有可為之事幸昌其志以濟斯民惟功名當久遠之
看則富貴乃緒餘之事如某者居貧甚肆從仕難任失
汗漫九垓之期分甘控地遂侏儒一囊之俸豈必鑽天

乃遠隨黃鵠之梯蓋願事碧雞之使雖神索於大巫之側當氣蘇於君子之前嗟遠道胡為來哉幸將在此居是邦事其賢者倘或許之

上楊誠齋

楊茨野

生于泗水尚未得夫子之門仰若泰山久欲造韓公之室第自顧學焉而未竟雖願拜長者而無從念一代之數人今惟此老紛四方之多慕況在是邦敬三沐以來前恨半生之已後恭惟某官惟古之好以道而鳴傳紫

巖之法衣源源誠學振廬陵之遺響續續文盟頃居于
朝獨行其志剛直自許蓋舜云禹云而皆然公正無私
縱洛黨川黨而不入屢逼雲霄而遽下徑尋泉石以歸
休故名滿八區而人愈尊才高一世而衆不忌泛觀近
事有感前修出處固殊孰能忘東山之興去就稍易未
免汙西風之塵誰歟掛冠若此完璧但使金章玉句之
妙膾炙古今自探乾端坤倪之微縣絡天地是豈容兒
輩之覺姑且遂老子之間然而寶閣寵加鋒車促召繫

造物之不捨顧吾道之何如為我強起無或憚勤竟力
辭於明詔惟有早退可以全節已久誓於此心豈葵藿
不傾於大陽抑黃花自香於秋晚拂扶桑而折若木共
看日景之舒長薄蓬萊而羞崑崙聊作地仙之蕭散伏
念某頭顱如許心志可知雖四下二中亦欲修後山辦
香之供而寸長尺短何由備東坡鋪席之裝有勞夢寐
於十年未吐胸懷之半語茲叨末第實竊餘波當修贄
謝鄉先生之初輒執屨從門弟子之役自憐小草之遠

志曷試洪鍾之微撞儻幸從容謂有如子之愛我何敢
覬望或甚於士之求公拳拳所陳疊疊莫既

見趙茶馬

彥綰

全篇用茶馬事

李梅亭

訪火井於臨邛偶逃水厄望星槎於仙漢行拜月題慰
江湖渴夢之深瞻原隰華鑣之沃伏念某地寒而根淺
年運而骨高斟酌胸中固欠可人之風味局促轅下粗
知範我之馳驅與其包裹供權倖之鑽不若蹭蹬任風
塵之老况乏揮毫之百斛固應病顙之十年懶問蓬萊

羣仙之司遂叱叩徠九折之馭其甘如薺豈必衆嘗言
刈其萑願為君御恭惟某官雲龍氣局天驥風標架屋
桃源三椀澆五千之卷乘軺轅道一雄將十萬之雌却
笑前丁後蔡之籠加安得超范軒轅之繳繞加臭味而
厚賓客漫令策兔褐之功畫骨相而遺毛皮諒必察驪
黃之外如某者不持圭璧未洗袴袍特窘城南晏食之
謀遂入冀北暮取之數味已輸於第一價敢望於倍三
草茶無賴空有名敢妄希於湔袂塞馬未必不為福或

可備於走趨

謁楊誠齋

黃竹坡

紀天下之達尊今孰先於耆舊備鄰封之小吏將求望
於聲光引舟小次於郊圻載輶庸趨於賓榻或者片言
之寵慰此半生之勤恭惟某官道主齊盟文傳正印舞
兩駟而遠駕欲揭商以厲周褊餘子而不為可蟻唐而
蠓漢儼清班而玉立載華問以川流有如德業之尊不
數踐揚之盛議論所到孰為君子孰為小人表裏無瑕

不負天子不負所學凜然進退之節光于熙洽之朝避
富貴於急流續明哲之餘響昔東坡慕香山之老終莫
遂於初心歐公歸潁水之濱動每懷於故國未有壯年
辭名位之寵獨以盛德耀鄉閭之間寄花竹之迷藏卷
波瀾於篇什天相名德諸福畢來人無間言百年幾見
雖國中萬鍾之賦祿初無欲富之心然天上二老之須
人諒有思賢之詔某門閭晚出蓬蒿卑飛結髮讀書愚
而信甚折腰為米貧則謀踈將祇服於掬官迺經從於

仙隱仰泰山北斗之譽方求登吏部之門賦雪車冰柱
之詩敢望出玉川之右



翰苑新書續集卷二十八